

Mengapa perlu tahu *keuangan* Islam?

KEWANGAN berteraskan prinsip syariah bukanlah isu baru dalam dunia ekonomi dan perbankan negara ini. Malah, penubuhan Bank Islam pertama di Malaysia pada 1983, menunjukkan satu penanda aras transformasi bidang kewangan dan perbankan negara kita ke arah industri kewangan berpaksikan syariah.

HANYA SATU ALTERNATIF?

Bagaimanapun, mungkin masih ada yang melihat pembiayaan kewangan Islam ini hanyalah satu alternatif bagi pembiayaan yang sudah bertapak lama berteraskan konvensional. Persepsi ini mungkin benar bagi bukan Muslim, sebaliknya memilih kewangan berteraskan prinsip syariah adalah satu kewajipan yang tidak boleh dinafikan sama sekali.

Sistem kewangan Islam boleh didefinisikan sebagai aktiviti muamalah atau kewangan yang konsisten dengan prinsip undang-undang Islam yakni syariah. Dalam prinsip syariah sangat jelas larangan terhadap aktiviti tidak bermoral, tidak beretika dan paling penting kewangan Islam jelas menolak aktiviti muamalah yang melibatkan riba, maysir (perjudian) dan juga gharar (ketidaktepatan). Sesebuah institusi kewangan Islam mempunyai objektif menjalankan operasi mendapatkan keuntungan tanpa sesekali mengabaikan kewajipan menyingkirkan unsur-unsur yang ditegah syarak.

Suatu kesedaran mengenai perbankan Islam meningkat naik dan juga berlaku permintaan secara universal terhadap sistem kewangan dan ekonomi bersifat adil sama ada kepada pelabur dan juga pengusaha. Nabi Muhammad SAW bersabda: "Akan datang suatu zaman di mana seseorang tidak mempedulikan sumber hartanya, apakah dari sumber yang halal ataupun haram." (Riwayat Bukhari, sahih)

Sebagai Muslim yang mempunyai akidah mentauhidkan ALLAH SWT, kita sama sekali tidak mahu tergolong antara golongan manusia yang tidak

mempedulikan sama sekali sumber rezeki dan pendapatan yang diperolehi.

UMAT ISLAM WAJIB TAHU


Dalam kalangan ilmuwan menyatakan ada sebahagian aspek ilmu kewangan Islam wajib dipelajari individu terutama mereka yang terlibat secara langsung dalam aktiviti perniagaan dan juga transaksi kewangan.

Dalam sebuah hadis daripada Ibn Mas'ud RA, Rasulullah SAW bersabda yang bermaksud: "Tidak akan berganjak kaki anak Adam itu sehingga ditanyakan kepadanya mengenai lima perkara...." Di antara lima perkara itu akan ditanyakan mengenai dari mana sumber hartanya dan juga di mana diinfakkan harta tersebut. Ini menunjukkan peri pentingnya seorang Muslim dalam memastikan sumber dan juga penyaluran hartanya mengikut prinsip yang digariskan Islam dan menjauhi sebarang unsur yang jelas ditegah bagi menjaga kesucian harta tersebut.

Bagi memahami kewangan Islam secara fundamental, kita haruslah merujuk kepada sumber al-Quran di mana ALLAH berfirman: "... ALLAH telah menghalalkan perniagaan dan mengharamkan riba". (Surah Al-Baqarah: 275)

Atas dasar inilah, kewangan Islam menggalakkan keusahawanan dan perniagaan, serta dalam masa yang sama mengharamkan riba dalam semua transaksi perniagaan. Dalam kewangan Islam wang dikendalikan sebagai medium pertukaran untuk membeli sesuatu aset sama ada berkaitan dengan jual beli, sewa ataupun pelaburan.

Dengan kata lain, perkara yang membezakan antara kewangan Islam dengan konvensional ialah konvensional berurusan niaga dengan wang dan dokumen dan bukannya aset atau barangan. Dalam sistem kewangan



Kewujudan Bank Islam menunjukkan satu petanda aras transformasi dalam bidang kewangan.

konvensional wang dikendalikan sebagai komoditi yang boleh dibeli dan dijual. Perkara ini sangat kontradik dengan sifat wang itu yang berfungsi sebagai medium pertukaran dan juga menyimpan nilai.

Kita boleh melihat asal fungsi penciptaan wang dan juga sejarah bagaimana wang diwujudkan kemudian dikembangkan untuk mewakili nilai sesuatu aset. Oleh demikian, transaksi menghasilkan wang ialah satu transaksi yang jelas mempunyai kontradik mewakili sifat wang itu sendiri.

Ini menunjukkan ia penting untuk kita semua memahami bagaimana kaedah yang selaras dengan prinsip syariah diamalkan institusi kewangan Islam dalam menghasilkan wang. Rasulullah

SAW pernah ditanya: "Pekerjaan apakah yang terbaik?", kemudian jawab Baginda SAW: "Pekerjaan yang terbaik adalah hasil usaha tangannya sendiri dan semua jual beli yang baik (sah)". (Riwayat Ahmad, sahih)

JUJUR DALAM JUAL BELI

Diceritakan seorang sahabat Nabi Muhammad SAW yang bernama Urwah RA, diminta Baginda SAW untuk membeli seekor kambing dengan wang satu dinar, kemudian Urwah RA membeli dua ekor kambing menggunakan satu dinar tadi. Urwah menjual seekor kambing tersebut dan membawa kepada Baginda SAW seekor kambing dan wang satu dinar, tsabit dalam hadis Rasulullah SAW mendoakan Urwah dan ini adalah ganjaran bagi orang yang jujur dan amanah dalam mengendalikan perniagaan. (Riwayat Bukhari)

Dalam situasi lain, sekiranya Urwah telah meminjam satu dinar pada permulaan tadi dengan syarat dia mestilah mengembalikan satu dinar ditambah seekor kambing, maka ia akan menjadi riba secara jelas. Melalui penglibatan perniagaan dan perdagangan, wang dapat ditukarkan kepada sesuatu yang bermanfaat seterusnya menjaga keuntungan yang sah untuk sebarang pembiayaan.

ALLAH berfirman: "... yang demikian ialah disebabkan mereka menyatakan sesungguhnya (untung) berjual beli itu sama sahaja seperti riba." (Surah Al-Baqarah: 275)

Bagaimanapun ALLAH menjelaskan dihalalkan perniagaan dan diharamkan riba. Ini menunjukkan adanya persamaan antara riba dan juga keuntungan, oleh itu menjadi tanggungjawab untuk setiap individu menilai dan melihat setiap transaksi muamalah yang mereka lakukan agar terhindar daripada najis riba.

Aktiviti keusahawanan dan juga perniagaan sebenarnya menggalakkan kejujuran, saling bekerjasama dan juga semangat dalam kegigihan berusaha bersaing secara sihat menurut prinsip syariah. Ini kerana hasil daripada nilai-nilai inilah yang akan menyumbangkan kebajikan masyarakat khususnya membangunkan institusi zakat dan wakaf di negara ini.



Setiap peniaga perlu mengetahui halal dan haram corak perniagaan yang dilakukan. - Ilustrasi Gayour